

Matagofie e Sui A'i Le Lefulefu: O Le Ala Faamalolo o le Faamagaloga



I le aluga o tausaga ma i a'u taumafaiga e saili le filemu ma le faamalologa i luga o lena ala o le faamagaloga atu, sa oo ina ou iloa i se ala maoae o le Alo lava lea o le Atua na togiola mo a'u agasala, o le Togiola foi lea o le a laveaiina i latou o e na matuai faatiga ia te a'u. Sa le mafai ona ou talitonu moni i le uluai upumoni e aunoa ma le talitonu i le lona lua.

A o tuputupu a'e lo'u alofa mo le Faaola, sa faapena foi lo'u manao e suia le tiga ma le ita i Lana pulupasama faamalolo. Sa avea o se faagasologa mo le tele o tausaga, na manaomia ai le lototele, fetāla'i, tuuto, ma le aoao e faalagolago i le mana paia o le Faaola e laveai ma faamaloloina ai. O loo i ai lava sa'u galuega e fai, ae ua le toe tiga lo'u loto. Ua ou maua "se loto fou" [Esekielu 36:26]—o se loto ua lagonaina le alofa loloto ma le faamaoni o se Faaola patino, o lē sa i o'u autafa, o lē sa taita'ia fimalie a'u ma le onosai, sa ta'ita'i a'u i se nofoaga e sili atu, o lē sa ma fetagisi faatasi, o lē sa silafia lo'u faanoanoa. . . .

Na saunoa Elder Richard G. Scott: "E le mafai ona e soloiesea mea ua uma ona faia, a e mafai ona e faamagaloga atu. O le faamagaloga atu e faamalolo ai manu'a tuga ma matautia, aua na te faatagaina le alofa o le Atua ina ia faamamaina lou loto ma le mafaufau mai le oona o le ita. E faamamaina ai lou loto mai le manao e tau'i ma sui. E maua ai avanoa mo le faamamaina, faamaloloina, ma le toe fuataiina mai o le alofa o le Alii" ["Faamaloloina o Mailaila Matuia o le Saunoa," *Liahona*, Me 1992, 33].

Sa maua foi e lo'u tama i le olaga nei se suiga ofoofogia o le loto i tausaga talu ai nei ma sa liliu atu i le Alii—o se mea semanu ou te le vaaia i lenei olaga. O se isi molimau lea ia te a'u o le mana atoa ma le mafai ona suia ai o Iesu Keriso.

Ou te iloa e mafai e Ia ona faamalolo le tagata agasala ma i latou na agasala i ai. O Ia o le Faaola ma le Togiola o le lalolagi, o lē sa loto e ofo mai Lona soifua ina ia mafai ai ona tatou toe ola. Na Ia fetalai, "Ua i o'u luga le Agaga o le Alii, aua ua na faauu mai ia te a'u e folafola le tala lelei i e matitiva; ua auina mai a'u e ia *e faamalolo i e loto momomoe* tala'i le saolotoga i le tafeaga, ma ia pupula mata o e tauaso, e *tuu saoloto i e ua faasauaina*" [Luka 4:18; ua faaopoopo le faamamafa].

Ia i latou uma o e loto momomo, faapagotaina, faasauaina, ma atonu ua faatauasoina i le tiga po o le agasala, ua Ia ofoina mai le faamalologa, faafoisia le malosi, ma le saolotoga. Ou te molimau atu e moni le faamalologa ma le faafoisia o le malosi ua Ia ofoina mai. O le taimi o lena faamalologa e eseese mo tagata taitoatasi, ma e le mafai ona tatou faamasinoina le taimi o le isi. E taua lo tatou faatagaina mo i tatou lava o le taimi e tatau ai e faamalolo ai ma ia agalelei ia i tatou lava i le faagasologa. E alofa mutimutivale pea lava le Faaola ma e gauai mai, ma e avanoa pea o Ia e tuuina mai le fesoasoani tatou te moomia.

I luga o le ala o le faamagaloga ma le faamalologa o loo i ai se filifiliga ia le tosotosoa ni mamamu po o ni sootaga lē manuia i o tatou aiga po o isi mea. Ia i latou uma i totonu o la tatou tosinaga, e mafai ona tatou ofo atu le agalelei mo le agaleaga, alofa mo le inoino, agamalu mo le lē migao, saogalemu mo le mafatia, ma le filemu mo finauga.

O le avatu o le mea sa faafitia mai ia te oe, o se vaega mamana o le faamalologa paia e mafai ona maua e ala i le faatuatua ia Iesu Keriso. Ina ia ola i se ala e te tuuina atu, e pei ona fai mai o Isaia, o le matagofie e sui a'i le lefulefu o lou olaga [tagai i le Isaia 61:3] o se faatinoga o le faatuatua lea e mulimuli i le faaitaiga aoao a se Faaola o lē sa puapuagatia i mea uma ina ia mafai ai ona Ia fesoasoani i tagata uma. . . .

Ou te molimau atu o le faaitaiga silisili o le alofa ma le faamagaloga atu o lo tatou Faaola, o Iesu Keriso, o lē na faapea atu i le tiga matuitui, "Lo'u Tama e, ia e faamagaloina atu ia te i latou, aua ua latou le iloa le mea ua latou faia" [Luka 23:34]. (Kristin M. Yee, "Matagofie e Sui A'i Le Lefulefu: O Le Ala Faamalolo o le Faamagaloga," *Liahona*, Nov. 2022, 37–38)